

Jisas - Alamlak

Mak

1.1

Jon Baftaisr Bro Nkifrarhu mrokfom kfo pthamo yiham

1 Asom Bro Nkifrarhu yon Jisas Krairhu barkof gutnius mrokfefm.

1.14-15

Jisasr Galilit rihingrnakmo yuhat

14 Jonr bi kalabus yiyetrn to be Jisasrn Galiliko yihato Bro Nkifrarhu gutnius mrokfefm ptha habrimourm.

15 Kfo memour, "Asor bi tu yiha mifr. Bro Nkifrarhu kingdomkot bi brbohwt. Nikmoh fasoh fasoh nefm wamong trohkahkomm Bro Nkifrarhu gutnius mrokfotn wawany yakiokomm."

1.21-27

Jisasr kmi yarh fknayet yimar yak marnyamo yuhat

21 Jisasr nd tur yak hanyomo hik tamnou yimampno yimomn Kaperneamt mifnahmom. Ndha Kaperneamt tohetmn rhu krna Sabat yihar rhumomr. Nd yiharn Jisasr ndharhof rhu rifinyuk rmonrn yihato Bro Nkifrarhu mrokfom rikfo nuhas bonuhasakmorm.

22 Jisasr mrokfom pthamohat nhai nd nkifra boririfhu tisam kanjo ptharmotr wanyrmorm. Nhai. Tu hifa ptha yembindmotrm, yimam nd ror pthayuk mrokfom wanyhato bok dukefm yakhato duka memom, "Barenko, ndar yimar pthiwa mrokfom hifa ptha yembindt marnyewurm."

23 Nd rhu rifinyuk rmonrn rhumor kmi yarh fknayet yimar. Jisasr kfo nuhas hanyetrn nd yimar sinyahato tau nakuyafhato kfo hutt memor,

24 "Nasaret thof Jisase! Ni asha niaronn, nome finji naruhannom? Nmoh yak batit niaro? Hti nhtiwann ni Bro Nkifrar yak htamo yimaye."

25 Jisasr sinyahato nd kmi yarhr kfo hutt memorr, "Ni nd kmi yarhe, tmifn tngt wayoukikhahnt, nd yimar wathu troh tanyrn."

26 Nd kmi yarhr inji wany hambtunihato tau tneh fnahmorn nd yimar thu troh tanyrn.

27 Nd yimam inji htihato be tuha mifoh rihanimom. Tuha tum rinakfo nakfo memom, "Bar yimako, ndart be tu wom nfrineft htitwonom. Nd yimar pthe mrokfote tamoh bbukettn nd kmi yarhr wany hambu tanyhato nd yimar thu troh tanyrn?"

1.32-34

Jisasr bok met yindarim yak marnyamo yuhat

32 Krifnano marr bi yohniyetrn, bok dbohnet dbohnetm, kmi yarh fknayetm hne hnamomm.

33 Nd kmithu met yindari bugat niahato nd ror rhumo kuny yifhatiktn nia rifiny yukatohmomr.

34 Jisasr fnahnehato bok met yindariroh wonk wonk dbohnefm fak marnya hanyrnorm. Yo nd kmi yarh fknayetm fak thu hanyrnorm. Kmi yarhm Jisasr hti hikhato duka memom, "Ndarr tu Bro Nkifrarhu Yoner." Be ndnatn Jisasr kfo gadiyaf hanyrnorm, nhai tfit pthani hanyrnorm.

2.1-12

Jisasr tir wura minysafet yimar yak marnyamo yuhat

1 Dfik marm yinyimotm tfit Kaperneamko yimor. Ndko yihato wom kunys rhuato pthamoatr met yindarim rhu wany yakitohmoum.

2 Nd kunyr rifinyaknimohat memom nndo tpmhur tohor. Kuny yifhatik yuhat finji wom finji yimam yihom fnahni mfnahnikfot. Ror Jisasr nd kunysn rhuato Bro Nkifrarhu mrokfom kfo ptha nuhasmoum.

3 Nd kunysn ptha hasetrn wom minysafet yimar husfihus yimam hnamomr.

4 Kunyr be tng mnderpat tohmotr, nhai wom yihotoham nd yimarhu hanyukm. Be inji htihato yura kuny mingiahus yak tmbrafmomt to be nd yuhatn nd minysafet yimar fafho thumomr.

4.35-41

Jisasr kfohato wifort minoh hmbremo yuhat

35 Nd yiharhu tu wuruh krifn Jisasr turhu disaiperm kfo memom, "Barenko, na kanga tek barat ahir tmbhonikahnomn, mkuko ainyom."

36 Be nd mmbrrt, bi nd tur rhumot, mikmbremomn hahir hayukmomr. Nd yonmari yima rifhur tuha htanyhato yimom. Wom mmbrrm rom rpat hir hayukmom.

37 Hir hanymomn buha dany yuhatn bro wifort sinyamot. Nd wifort sinyahato bi fak mndhu hanymotm. Bi bus tas finjo hanymott mmbrrt.

38 Jisarr mmbrrthu yifhikorn yak tuhtanimorn hwemor. Nd wifortpno yihom yak thohato kfo memomr, "O Tisaye, wasinya. Nom bi wifort kak mndhutwotnom. Nine ka nhai yanhokahn?"

39 Jisarr wasinyahato nd wifort be tnge kfo memort, "Be tmifn, wateh tmbho." Be inji kfomotr nd wifort teh tmbhohato tek barit nhai wom natonrmot.

40 Jisarr nd turhu disaiperm kfo memorm, "Tamohmpno yakrmitako? Nhai duka mekahko, 'Rorpn kitwonom. Aduka yanhowahnom?' "

41 Rom inji wany yanhohato kfo memom, "Ndarr tamohtet yimarn wiforti burifhut wany yakiohato minoh hmbrrif?"

5.22-24

22 Judaroh rhu rifinyuk rmonthu wom tohukatoh yimar, rorhu yufat Jairusr, niamor. Niamorn Jisarr mhtihato rorhu wurampno mtabokmemor.

23 Mtabokmehato kfo memor, "Nanhu yont noh wururifhut kekwott. Wania tir wahtakahtnt marnyaniraht."

24 Be Jisarr wanyhato hik hanymorr. Rof yimohat bok met yindari rifhur hik hanymomrn be nahuta yaborr hanymom.

5.35-42

35 Jisarr ptha hasetrn Jairusrhu kunyshom toni hnehato Jairusr yihom kfo kangmr, "Mirahn Bror ahany furayanr kunykort. Ninhu yont bi mfaknit."

36 Jisarr rom pthayuk mrokfom wany marsisahato Jairusr kfo memorr, "Ni mirahn awany yanhoya. Ninhu bro dukefr be duka mekfot, 'Nanhu yont tfit myenyjworaht.' "

37 Be nd met yindari rifhur ndhar kfo rafo tanyomorm rorhu hikneft. Pitari Jemsre Jonr, Jemsrhu habhir, romrpam husfirparpat kfaknimor.

38 Nd Jairusrhu kunys mwanyaknimomt yimam nur hasomohat.

39 Jisarr kunys fknehato rim kfo memorm, "Tamohmpno nurwako? Nd yont nhai nohrfot, be hwitwot!"

40 Jisarr inji kfomotr haningemomr. Nd nur kunys rhuyuk yimam yak tuhafhato fnah buganimotm, nd yonthu yifammafi turhu husfirpa disaiperm yaknitarm yimom nd yont rhumo rumtn.

41 Rim fnahnihato nd yonthu tirenr wayekwart kfo kangrt, "Talita kumi." (Nd mrokfothu yimbu yuhat, "Metene, na kfiwann wasinya.")

42-43 Be nd metent inji kfomotrt yudbat wasinyamotn ufaufaumot. Yonthu yifammafi inji htihato be tuha yafotha duhatf tohmof. Jisarr kfo memorf, "You! Mirahfn akfo nuhas mif mifnomm nda nifnahu yont myenyjwi yuhat." Nd yonenthun gunyjimm 12-pelakfot. Inji kfonihato kfo memorm, "Nuwa wayak wahefnt."

7.18-23

18 Jisarr memorm, "Nikome ka nhai yima yuhu duhateko? Yima yuhetko arhuko, to yakrfokomm na pthayuk mrokfefm. Wawanyko! Nd tng yuhat yiyafoyuk yeshrt o wom tamohm, nhai ndmn Bro Nkifrar htihato kfo mikahr, 'Ni bi fasoh yimaye.' Nhai.

19 Nd yiyafoyuk yeshrt nhai yima yuhurn yikahm. Nhai. Nd yiyefiwa yeshrim nyunguram yuhat yitamn ript yihom yorhwom. Ript yihom rhuhato kto tfit rikunys kitm." Jisarr duka memor, "Tamoh tamoh yeshrim ye fura bofurayukem." Ndnatn inji kfomorm.

20 Tfit kfo memorm, "Nd yiro yima yuhurio sinyahato newa nefmn, ndmn Bro Nkifrar htihato kfo kangr, 'Fasoh yimayer.'

21 Nd na kfiwa yima yuhur sinyewa fasoh nefm, ndm inji korhm: nd fasoh fasoh dukefr, yaum kanjo met yindarim niwa nefm, rikohneft, yimar nambur sinyahato womr was furaneft, womrhu mettpno rim fnahneft,

22 yimarhu yima yuhur kangr tamoh tamoh wuskam, maruham nanrpayanuhem, nhai womm henyeft, nd nd fasoh nefm yima yuhur sinyewamn ni womn yak bebneft womr, kfo nhebehneft, tuhagrhatoh yimtina duha na fura bofuriwa nefm, womrhu dborah wuskam o mett o tamoht htihato tfit ni womn duka bebneft womr, 'O tamohmpno ror yekrt nd banuhah mett o shrt. Nann yakrfoyant.' Ndhtet dukefm o womm faso faso harhu htfasneft, o yufa yurak htaneft, o duka marnya duha naknita nefm.

23 Tom nd nd nefmn yiro yima yuhurnio sinyewamn Bro Nkifrar htihato kfo kangr, 'Fasoh

yimayer.' "

9.2-8

Jisasrhu thatipt fnhumo yuhat

2 Kto 6-pela yiham yinyimotm Jisasr Pita Jems Jonrom yaknihato turpatm muhmom tu mfro wayakmo kminysoftn. Turpatm rhu hasohato asha htiyaf hanymomr fnhuyaknimor. Memom nndo yindeng nyisofr fnhutwor.

3 Yimar hmbremo hmbresham rpat fnhu bugaknihato memom nndo bruwohmr katiwur. Nhai ndar bbinysofthu wom yimar inji rhu wonakrmor. 4 Ee tfit htimomf Irajia Mosesrof Jisasrpto mtohhato pthamohat.

5 Pitar inji htihato Jisasr kfo memorr, "Tisaye, nmoh asha tohneft hifa. Ka husfirpa kunyenm yimanom nhombrahato singorahnom. Ninhu womt, Mosesrhu womt, yo Irajjarhu womt."

6 Pitar nd mrokfot kfo pthamohat be yakrmehato be tu furamort nd mrokfot.

7 Be tfit wom gribfat niamotn yawihnehato kasi hmbremotm. Yiro nd gribfatn wom tngt niamot. Nd tngt kfo memot, "Ndarr nanhu Yoner. Be tu marbitn htewanr. Ror pthayuk mrokfom wany yakiokfot."

8 Yudbat yukatoh habri memom ahtinom nd mrokfo pthayuk yimar, to nhai, nhai wom yimar htirmom. Tu nd Jisasrpar htimom.

12.28-31

Nyingako mtohekwa tu bro boririfhut

28 Jisasri Sadyusim mrokfom nakfo nakfomoahat wom nkifra boririfhuthu tisar rhuhatu wany yakitoh hasomourm. Sadyusim Jisasr kfo ttiwonmoatmr tfit Jisasr kfo nuhas marnyamourm. Ror inji wany hasohato ttiwon memorr, "Ndar nom wanuka boririfhum, fitoh boririfhutn nyingako tohekwat?"

29 Jisasr wanyhato kfo memorr, "Nd nyinga tohekwa boririfhut inji kfiwut: 'Niko Isrerko wawany marnyako, Bro Nkifrarpar nmoh Nkifrar rhukfot.

30 Bror ninhu Nkifraye, ndnatn ninhu yuhuwaf marbi bugam, ninhu yafothat, yo ninhu yima yuhu bugam be rorparn htakfot.'

31 Yo ndwom boririfhutne: 'Tunn yak marnyewa kanjo inji womm yak marnyakfot.' Nd hus boririfhufn tu bro boririfhu mifef."

14.10-11

Judasr kfo fakiomor, Jisasrhu hndhna yuhat

10 Nd yiha 12-pela disaiperrhoh wom disaiperr kutewumr Judas Iskeriotr prisroh bro yimampno yimor. Yihato kfo memorm, "Inji inji hndhharuhanr."

11 Nd bro prism wanyhato yindhormom. Yindhorrhato kfo memomr, "Maruha hirahnomn." Judasr wanyhato yima yuhur fak nhtamourr Jisasrhu hndhna yuham.

14.44-46

44 Nd Jisasr hndhnakyuk yimarn bi kfo hta bohta memorm, "Wahtiyafu hanyswokma. Na yauyaknihato fitoh yimar mkihendhoraknitwa, wamitwako, tor nd yima Jisasr. Ee inji bi htitwokma, nd yimarn yauyaknihato yakkfot. Yakhato be yima tire hanyruhakomrn bro yimampno hanykfot."

45 Be nd Jisasr rhumo tkitt mfnah-mohat, Judasr yauyaknimorn Jisasr rim kihendhoraknihato kfo kangrr, "Tisa."

46 Be yimam yauyaknihato tirtir fakmomr.

15.6-15

Pailatr kfomor Jisasr yura bgre misn anohr

6 Pasofa burwa yiharn kalabus tohyuk wom yimar Judiarioh gafanar kak thu hnamourr. Tu kmi thofmn fitoh yimar yibonwom yak tuhafoneft, yufat yutamoatm, nd yimar kak thumour.

7 Nd kalabus htamo yimam gafmanrpno wom yahrt rhumott wom yimam nambur tonehato yima wasmom. To nd yimam kalabus htamomm. Nd yimaroh wom yimarhu yufat Barabasr.

8 Nd Pasofakfot yi rifinyuk yimam yi rifiny bugahato Pailatr kfo memomr, "Ni tu Pasofa yiha na hakuta kanjo hrek inji wana."

9 Pailatr mtohnihato ttiwon memorm, "To finji dukewako? Nda Judaroh kingr kangko ayak tuhafoya?"

10 Jisasr be prisroh bro yimam kfo wok furahato kalabus htamomr. Ndnnetn Pailatr ndhtet kfo ttiwon mrokfot htamort.

- 11 Prisroh bro yimam bi kmi thofm kfaf hany memoumm, "Wakfo naku wameko, 'Pailatr Barabasr ayak hfhanafor.' " Be nd bro prisroh kfomo yuhat kfo hikmom.
- 12 Pailatr wanyhato ttiwon memom, "To nd niko kfo yamuka Judaroh kingr, nd yimare finji naruhoanr?"
- 13 Nd yima rifhur tohmor wanfak wanfak memom, "Bgre misn wakihegirkomr."
- 14 Pailatr memor, "To tamohmpno? Finji namotr inji naruhoanr?" Tfit mrhuni mrhuni memom, "Bgre misn wakihegirkomr."
- 15 Be Pailatr memor, "Rroh yima yuhum ayak marnayanm." Ndnatn Barabasr yak tuhafmorrn tfit Jisasr yakhato soldiaroh tirm htamorr. Memor, "Romn wife wife tabotakhato bgre misn kihegirrahmr."

15.33-39

Jisasr nohmo yuhat

- 33 Dany marrn marrhu nukeft be rim nohnimot. Kantri bugat be yambontift rhumom. Wuroh 3 kilok krif marr tfit niamor.
- 34 Tri kilok kanjo marr toh hanymor Jisasr tau nakuyafmor, "Eli, Eli, lema sabaktani?" Nd mrokfothu mrokfo yimbu yuhat inji kfiwut, "Nkifraye, Nkifraye, tamohmpno bi frtrohwona?"
- 35 Inji kfo nakumotr brbo tohyuk yimam wanyaf hanyhato kfo memom, "Nd yimar IraiJar nakutr."
- 36 Wom yimar toni hanyhato spans yakmorn wainpamn tayifakhato miyefn htahato memor, Jisasr hikahta bupam ndtn tmasakrahr. Bupam hehato kfo memor, "Afo htiyaf hanyrahnom, IraiJar naku kfihat IraiJar finji naruharr?"
- 37 Be wuroht tau nakuyafmorn be mfaknimor.
- 38 Yimar myakni hanymo fijo nd bro rmonthar temperrhu tu Nngrajoh Hnaru Gnanhehr gna rafomor be buha mifn rmonthar yoh nmbmorn mano mano rim rhu mrhumor. Yurak wuyoh nmbmorn miyoh nmbm witanihato mano mano rim hir mhirmor.
- 39 Jisasrpnno brbo tohmo amiroh keptenr Jisasr nohmo yuhat htihato tuha mfha tha duhatr rhumor. Memor, "Dajohmn! To finji tfit kforuhanom? Ndar yimar tu Bro Nkifrarhu Yon mifer."

15.42-46

Jisasrhu thatipt tahi muhtn rihtamo yuhat

- 42-43 Judaroh taun Arimateathu wom yimar tohmour. Rorhu yufat Josefr. Juda kaunserkfot rorn nd kaunserkfot hingrna tohnhomourm. Bok met yindarim rorhu nefm hifa hti wofnmoumm. Rorhu dukeft duka memour, "Bro Nkifrarhu kingdomkfot afo nanhu nyingaye afo htiruha!" Nd dukeftpno tohmour. Nd Fraide yihar, bi tu Judaroh bro rhu krna Sabat yihar bi rhu yibon hanymomr. Sarere yihar nd rhu krna yihar rhumoumr. Ndnetrn krifnano Jisasr bi nohetrn nhai wofnrnmor Jisasrhu tfkhat wom rhukfot. Pailatrpno yimorn mtohhato ttiwonmor Jisasrhu thatiptu yakni yopneft. Nhai yakrmi hanyhato yi mttiwonmorr.
- 44 Pailatr Jisasrhu noh mrokfot wanyhato tuha mrokfo duhatr rhumor. Be yudbat turhu keptenr nakumorr. Memor, "Afo tu keptenrpno wany marnyaruha Jisasrhu noh mrokfot."
- 45 Pailatr keptenrpno wany sungunahato ee Josefr kfo fakiowafmorr Jisasrhu thatiptu yaknineft.
- 46 Josefr Pailatru tngt wany marnya tanyhato yimorn nfri ganyom rmonthar wiknakmor. Nd nfri rmonthar yak nyingt htatahato Jisasr bgre miyetr wuyak kasuhakmorn ganyom rmontharn wahtahato rir hmbremorr. Rir hmbreyaknihato hanymorr. Hanyhato tahi muhtn rihtamorr. Nd tahi muhtn htamorrn tahis yakhato tahishu muht hta tittafmort.

16.1-7

Jisasr sinyamo yuhat

- 1 Nd rhu krna Sabat yihar rhuni bugahato Makdala efkot Mariat yo Jems Saromerofhu mmem Mariat welpam wiknakhato memof, "Hanyhato Jisasrhu thatipt gbrorna wunarahnonr."
- 2 Sande yiha bi dbha ksfutn sinyanihato yimom nd Jisasr rihtamo tahi muht.
- 3 Yau hanyhato tfit tuf rinnakfo nakfo hany memouf, "Nd tahi muht frtasif tanymo tahise frohmn yak rihtaf nuhafrahamno?"
- 4 Inji nnakfonihato asha mtohhato htimoft nd yonmari tahis muht frkih tanymot nhai wom rhurmot.
- 5 Be sfnohtn be yauyaknihato fau fknenimof. Yiro rim tohhato asha htimoft wom yima damiagr yok thar hmbreyetr tirmifko rhu hasomor. Be tuha mrokfo duha tohmof.

6 Nd yima damiagr kfo memorf, "Mirahfn afohtasno. Nifn ka nd bgre mis kihgirmo Nasaret thof Jisasrhu yau hafott niefn. Nd yimar bi sinyani yifir. Ndart ror yarim htamo tkitt, bi sfnoh tkit furayet.

7 Waikahfnn turpno yau htfasmoa yimam yo Pitar wakfo wamitwafnm, Jisasr bi sinyanihato bi Galiliko mtoh gari hanitrm. Tur kfomo yuhatn Galiliko ndko amhtitwamr."

16.15-16

15 Kfo memorm, "Nikomn ndar bbinysofthu kmi kmim nanhu mrokfot wakfo nuhashi habri bugatwakomm.

16 Waptha habrikahkomn fitoh yimam wany yakiohato baftais kak hanitrm, nd yimam Bro Nkifrarhu tirtn rhurahm. Yimam nhai wany yakiokahm nd yimam be bro kotkfot tohrahm.

16.19-20

Bro Nkifrar Jisasr hefenko hamuhmo yuhat

19 Bro Nungothet Jisasr nd mrokfom kfo buganihato be Bro Nkifrar yakhato hamuhmorr hefenko. Hamuhmorrn turhu bro bbukeft yorhwa tirmifko fak htamorr.

20 Be Jisasrhu disaiperm kmi kmim yi htfashato Jisasrhu mrokfom kfo ptha habrimomm. Bro Nungothetr tohno-moatrm rom pthamoa mrokfem fipetm rhumoum. Wom wom mirakerkfom rpat hingrna htfasmoum. Ndnatn rom pthayuk mrokfom wany yakiomoumm.